

Inatsisartut Suleriaasianni § 33, imm. 3, nr. 1 naapertorlugu Nunat Avannarliit Killiit Siunnersuisoqatigiiffianni Inatsisartut aallartitaasa siulittaasuata Josef Motzfeldtip aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 1/2011-mik, ataani allassimatut oqaasertalimmik, Inatsisartut tapersiinissaannik Inatsisartut aalajangiiffigisassaattut siunnersuut:

Nunat Avannarliit Killiit Siunnersuisoqatigiiffiata Islandimi, Savalimmiuni Kalaallillu Nunaanni naalakkersuisut kaammattorpai ukiuni qulilinni kingullerni avatangiisitigut silallu pissusiisigut allannguutit malitsigisaasa nunarsuup immikkoortuanut maanga nunallu tamalaat akornanni suleqatigiinnermut sunniutigisimasaat eqqarsaatigalugit nunani pineqartuni pingasuni ataatsimut soqutigisat nalunaarsorneqarnissaannut iliuseqaqqullugit. Nunani pineqartuni nunanut allanut naalakkersuisut naalakkersuinermik suliialinnik suliassaqarfimmilu immikkut ilisimasallit siuttuunik peqataaffigineqartumik ataatsimeersuartitsinerat aallaaviusinnaavoq, tassani pineqartoq eqqarsaatigalugu ataatsimut naalakkersuinikkut ingerlatseriaasissamut missingiut oqallisigineqarlunilu suliarineqarsinnaassalluni.

Tunngavilersuut:

Nunani avannarlerni killerni ukiuni qulilinni kingullerni avatangiisitigut silallu pissusiisigut allangornerit annertuut misigineqartarsimapput. Taakku amerlaqisunik assigiinngitsunillu sunniuteqartarsimapput sunniuteqartuassallutillu, minnerunngitsumik nunarsuup immikkoortuani tamaani aatsitassanik pisuussutinillu iluaquteqarniarnermut atatillugu taamatullu aamma issittumi angallannikkut periarfissat annertunerulernerisigut aningaasarsiornerup annertusineratigut. Tamakku allannguutillu allat pissutigerpiarlugit nunarsuup immikkoortuani tamaani pisut pissutsillu nunanit amerlanerujartuinnartunit soqutigineqaleriartorlutillu akuuffiuleriartorput.

Taamaalilluni nunarsuarmioqatigiit akornanni suleqatigiinnermi Nunat avannarliit killiit inissisimanerat sukkasoorujussuarmik pingaaruteqaleriartorlunilu ineriaallangorpoq. Tamatumunnga atatillugu pingaaruteqarluninnoq nunat avannarliit killiit apeqqutit issittumut atlantikullu avannaanut tunngasut pillugit naalakkersuinikkut aalajangiiniartarnerni qitiusumik inissimanerminnik qularnaarinninniarnissaat, taamaaliornikkut nammineq soqutigisaminnik illersuisinnaanerulerlutik.

Taamaattumik Nunat Avannarliit Killiit Siunnersuisoqatigiiffiata pingaartutut isigaa Nunani avannarlerni killerni pissutsit allangorsimanerat eqqarsaatigalugu nunat pineqartut ataatsimut soqutigisaasa nalunaarsorneqarnissaat, soqutigisat pineqartut siunissami attattuaannarnissaat siunertaralugu. Suliassaqarfimmi nunat avannarliit killiit ataatsimut politikkeqalernissaat anguniakkanut ilaasinnaavoq. Taamaaliornikkut nunat pingasut naalakkersuinikkut nukittunerulissapput nunarsuullu immikkoortuani najugarisaminni ineriartornermut sunniuteqarnerulerlutik.

Taamaalilluni aallaavittut nunani nunanut allanut naalakkersuisut ataatsimeersuartitsinissaat kaammattuutigineqarpoq, tassani ilaatigut nunarsuup immikkoortuani tamaani ataatsimut soqutigisat suunersut suussusersineqarsinnaallutik. Issittumut tunngasut misissorneqarsinnaapput

minnerunngitsumik aningaasarsiornikkut ingerlataqarnerulerneq aningaasatigullu soqutigisat eqqarsaatigalugit. Pisuussutitut kikkut oqartussaanerannik aaqqiagiinnginnerit aaqqinniarneqartarnerannut nunat tamalaat akornanni suleqatigiinnerup inissisimanagera aamma oqallisigineqarsinnaavoq.